

Broj: 10-14/5-362-1-8-8/19

Sarajevo, 5.9.2019. godine

Na osnovu člana 69. stav (2) tačka d) Zakona o javnim nabavkama BiH (Službeni glasnik BiH", broj: 39/14) u predmetu javne nabavke usluge održavanja registara, aplikacija i web portala koje koristi Federalno ministarstvo poljoprivrede, vodoprivrede i šumarstva, na preporuku Komisije za javne nabavke, federalni ministar poljoprivrede, vodoprivrede i šumarstva, donosi

ODLUKU

o poništenju postupka javne nabavke usluge održavanja registara, aplikacija i web portala koje koristi Federalno ministarstvo poljoprivrede, vodoprivrede i šumarstva

Član 1.

Poništava se postupak javne nabavke usluge održavanja registara, aplikacija i web portala koje koristi Federalno ministarstvo poljoprivrede, vodoprivrede i šumarstva broj:10-14/5-362-1-8-1/19 iz razloga što nema prihvatljivih ponuda.

Član 2.

Ova Odluka objavit će se na web stranici Federalnog ministarstva poljoprivrede, vodoprivrede i šumarstva i dostaviti ponuđačima koji su učestvovali u postupku javne nabavke.

Član 3.

Za izvršenje ove odluke zadužuje se Sektor za finansije i računovodstvo.

Član 4.

Ova Odluka stupa na snagu danom donošenja.

OBRAZLOŽENJE

Postupak javne nabavke pokrenut je Odlukom o pokretanju postupka javne nabavke broj: 10-14/5-362-1-8/19 od 13.08.2019. godine za usluge održavanja registara, aplikacija i web portala koje koristi Federalno ministarstvo poljoprivrede, vodoprivrede i šumarstva. Javna nabavka je provedena putem otvorenog postupka. Procijenjena vrijedost javne nabavke bez PDV-a iznosi: 80.000,00 KM. Obavještenje o nabavci objavljeno je na Portalu javnih nabavki pod brojem: 855-1-2-8-3-10/19 od 14.8.2019. godine.

Do krajnjeg roka utvrđenog u Tenderskoj dokumentaciji za dostavu ponuda, tj. do 4.9.2019. godine u 10:00 sati, pristigla je jedna (1) ponuda, i to ponuda grupe ponuđača "KING ICT" doo Sarajevo i „KING ICT“ doo Zagreb.

Nakon pregleda pristigle ponude utvrđeno je da ponuda ne zadovoljava uslove iz Tenderske dokumentacije. Tačkom 3.4, podtačka 2. Tenderske dokumentacije, koja se odnosi na tehničku i profesionalnu sposobnost ponuđača, propisano je da ponuđač mora imati najmanje 7 (sedam) zaposlenih ili angažovanih stručnjaka iz IT oblasti koji će biti na raspolaganju Ugovornom organu u izvršenju ugovornih obaveza i to :

- Voditelj projekata, VSS, najmanje 5 godina radnog iskustva na poslovima vođenja projekata, odnosa sa poslovnim korisnicima, kontrolom kvalitete , 1 izvršilac
- Programer, VSS, najmanje 3 godine radnog iskustva na poslovima razvoja/ programiranja/ web baziranih aplikacija na Microsoft razvojnom okruženju, 3 izvršioca
- Stručnjak za Data Management and Analytics uključujući i Microsoft Power BI, VSS, 1 izvršilac
- Administrator baze podataka, VSS, najmanje 5 godina radnog iskustva na dizajnu, razvoju i administriranju kompleksnih baza podataka na Microsoft platformi, 1 izvršilac
- Sistem inženjer za Microsoft tehnologije, VSS, najmanje 5 godina radnog iskustva u oblasti sistemskog hardwera, 1 izvršilac.

Kao dokaz za ispunjenje navdenih uslova ponuđač je, pored ostalog, bio dužan dostaviti: potvrde o radnom iskustvu na predmetnim poslovima za angažirano osoblje, uvjerenje o broju i imenima zaposlenih radnika kod ponuđača izdat od nadležne institucije i ugovore o poslovno tehničkoj saradnji /ugovore o djelu za angažirane osobe iz kojih se tačno može utvrditi da je navedena osoba na raspolaganju ponuđaču za izvršenje predmetne usluge.

Grupa ponuđača je dostavila Listu zaposlenih ili angažovanih na izvršenju ugovornih obaveza na kojoj se nalazi sedam osoba, od kojih ponuđač „KING ICT“ doo Sarajevo navodi svog zaposlenika Jasnu Pleho, kao voditelja projekta, dok se šest osoba navodi kao angažirane od strane ponuđača „KING ICT“ doo Zagreb, i to: Robert Mareš, Luka Juraković, Danijel Šćukanec, Dalibor Margotić, Vesna Opačak i Franjo Bubalo. U cilju dokazivanja radnog iskustva za Jasnu Pleho dostavljene su dvije potvrde, i to potvrda izdata od strane „KING ICT“ doo Sarajevo i potvrda „Arch design“ doo Sarajevo. U Potvrdi „KING ICT“ doo Sarajevo od 29.8.2019. godine nije naveden period u kojem je Jasna Pleho bila angažovana na poziciji voditelja projekta te se na taj način nije moglo provjeriti ispunjavanje uslova iz Tenderske dokumentacije da voditelj projekta mora imati pet godina radnog iskustva na tim poslovima.

„KING ICT“ doo Zagreb dostavio je Potvrdu o radnom iskustvu od 29.8.2019. godine za Roberta Mareša u kojoj nije navedeno koliko je bio angažovan na poziciji programera te se na taj način nije moglo provjeriti ispunjavanje uslova iz Tenderske dokumentacije da programer mora imati tri godina radnog iskustva na tim poslovima. „KING ICT“ doo Zagreb dostavio je Potvrdu o radnom iskustvu od 29.8.2019. godine za Luku Jurakovića u kojoj nije navedeno koliko je bio angažovan na poziciji programera te se na taj način nije moglo provjeriti ispunjavanje uslova iz Tenderske dokumentacije da programer mora imati tri godina radnog iskustva na tim poslovima. „KING ICT“ doo Zagreb dostavio je Potvrdu o radnom iskustvu od 29.8.2019. godine za Danijela Šćukaneca u kojoj nije navedeno koliko je bio angažovan na poziciji programera te se na taj način nije moglo provjeriti ispunjavanje uslova iz Tenderske dokumentacije da programer mora imati tri godina radnog iskustva na tim poslovima. „KING ICT“ doo Zagreb dostavio je Potvrdu o radnom iskustvu od 29.8.2019. godine za Vesnu Opačak u kojoj nije navedeno koliko je bila angažovana na poziciji administratora baze podataka te se na taj način nije moglo provjeriti ispunjavanje uslova iz Tenderske dokumentacije da administratora baze podataka mora imati pet godina radnog iskustva na tim poslovima. „KING ICT“ doo Zagreb dostavio je Potvrdu o radnom iskustvu od 29.8.2019. godine za Franju Bubala u kojoj nije navedeno koliko je bio angažovan na poziciji sistem inženjera te se na taj način nije moglo provjeriti ispunjavanje uslova iz Tenderske dokumentacije da sistem inženjer mora imati pet godina radnog iskustva na tim poslovima.

Kao dokaz o angažovanju navedenih osoba „KING ICT“ doo Zagreb je dostavio Potvrdu klasa:034-04/19-03/21, urbroj:341-25-11/6-19-274 od 26.8.2019. godine Hrvatskog zavoda za mirovinsko osiguranje, Područna služba u Zagrebu, odjel za mirovinsko osiguranje u kojoj se navodi da obveznik doprinosi „KING ICT“ doo Zagreb na dan 26.8.2019. godine ima prijavljenih 411 radnika. U Potvrdi nisu navedena imena zaposlenika. „KING ICT“ doo Sarajevo je u Ponudi dostavio akt pod nazivom: „Pojašnjenje u vezi sa potvrdom/listom uposlenika Hrvatskog zavoda za mirovinsko osiguranje“ koje je datirano sa 23.8.2019. godine. Dakle, navedeni akt je donesen prije izdavanja navedene liste od strane Hrvatskog zavoda za mirovinsko osiguranje i u njemu se ne navodi na koju listu se odnosi te je izdat od strane firme iz Bosne i Hercegovine koja tumači propise kojima se uređuje ova oblast u Hrvatskoj. U aktu se navodi da kao dokaz o ispunjavanju uslova iz tačke 3.4.5. Tenderske dokumentacije se dostavljaju elektronski zapisi (elektronske radne knjižice) o podacima evidentiranim u matičnoj evidenciji za zaposlenike angažovane na izvršenju ugovornih obaveza ovjerene od strane ponuđača, a koji su elektronski izdati od strane Hrvatskog zavoda za mirovinsko osiguranje iz kojih se vidi da su navedeni stručnjaci zaposlenici „King ICT“ doo Zagreb. Prilikom pregleda Ponude je utvrđeno da navedene elektronske radne knjižice nisu dostavljene uz istu te je Ugovorni organ, dana 4.9.2019. godine, o istom tražio pojašnjenje od strane Ponuđača. Ponuđač je isti dan odgovorio:“ Zahvaljujemo se na ukazanom propustu, a koji se potkrao kao rezultat korištenja iste forme teksta dokumenta u drugim javnim nabavkama. Molimo da zanemarite navod da su elektronske radne knjižice dostavljene u prilogu, jer ti dokumenti svakako i nisu relevantni za dokazivanje početka i trajanja radnog odnosa u ovom postupku javne nabavke“. U skladu sa navedenim, Ugovorni organ nije mogao utvrditi da su osobe: Robert Mareš, Luka Juraković, Danijel Šćukanec, Dalibor Margotić, Vesna Opačak i Franjo Bubalo na raspolaganju Ponuđaču u cilju izvršenja ugovornih obaveza. Naime, ponuda ne sadrži uvjerenje nadležnog

organa da su navedne osobe zaposlene kod „KING ICT“ doo Zagreb, a ako se takvo uvjerenje nije moglo pribaviti po osnovu propisa u Republici Hrvatskoj, nisu dostavljene niti elektronske radne knjižice, ugovori o radu, ugovori o djelu ili dr. na osnovu čega bi se nesporno moglo utvrditi da Ponuđač ispunjava uslove iz tačke 3.4. Tenderske dokumentacije u pogledu ispunjavanja uslova po osnovu profesionalne sposobnosti.

U skladu sa navedenim, obzirom da je Ugovorni organ u Tenderskoj dokumentaciji jasno naveo da se dokazivanje radnog iskustva na određenim poslovima i period njegovog minimalnog trajanja dokazuje potvrdom koja treba da sadrži ove podatke, da se raspolaganje sa kvalificiranim osobljem dokazuje uvjerenjem nadležne institucije za zaposlenike, odnosno ugovorima za angažirano osoblje, te da jedina pristigla ponuda ne sadrži ove dokaze, imajući u vidu odredbe člana 68. stav 4. tačka j) Zakona o javnim nabavkama, a na osnovu člana 69. stav (2) tačka d), člana 70. stav (4) i (6) i člana 71. stav (1) Zakona o javnim nabavkama odlučeno je kao u dispozitivu ove odluke.

POUKA O PRAVNOM LIJEKU:

Protiv ove Odluke može se izjaviti žalba Uredu za razmatranje žalbi BiH, putem Federalnog ministarstva poljoprivrede, vodoprivrede i šumarstva, u roku od 10 (deset) dana od dana prijema ove Odluke.



Dostaviti:

1. „KING ICT” doo Sarajevo;
2. „KING ICT“ doo Zagreb;
3. Komisija za javne nabavke;
4. Sektor za finansije i racunovodstvo;
5. a/a.